



## Comité - Schnitzelbank 1927

# Beppi - Clique

Mel.: Grambambuli

O' Basler Fasnacht, herzig Festli  
Und sicher s'scheensti uff d'r Welt  
S' ka menge sich an dir ergötze  
Und wenn ihm au d'r Pulver fehlt  
Refr.: Do denkt-me an-d' Betribig nit  
Für d' Schulde zahle isch no Zit  
In Freudestrudel nimm e Sprung  
Und du blib'sch ewig jung!

1

E' Hunger und e' Schwindelkünstler  
Die soziali Frog studiert  
S' kenn ohni Frass e jede läbe  
Wenn er si Mage recht trainiert  
Doch het versait die Attraktion  
Brennt dure mit-em Hungerlohn  
Und sini Gönner hän persee  
Kohldampf im Portmaunee.

2

Entweder isch e Wib en Engel  
Wenn nit so steckt-d'r Teifel drin  
Dä Billeteur dert z'Allschwil usse  
Hän zwei behandelt gar nit fin  
Valutawi und Schlangegift  
Hyänekralle zümpftig schliff  
Und Fratze glicht bi Nacht und Tag  
So scheen im Gartehag.

3

Bim Wettstaibrückli, nai wie reizend  
Im Summer sin die Wasserfee  
Sie wänn statt in däm Pfützekaste  
Im offne Rhi e Bädli näh  
D'r Wachter vo d'r Sittlichkeit  
Nimmt Astoss dra, er het kai Fraid  
E' nassi Unschuld, s' Meitli, d' Frau  
Im Pelz trag dert zuer Schau!

4

D'r Lehrer soll nur Aehli mache  
Sogar im allergrösste Strolch  
Mit Engelszartheit ein betaste  
Wenn er sogar bedroht mit Dolch  
Und Chocolate däm wo ful  
Schopp ihm au no in's frechi Mul  
Sunscht schlen die Reine-Prügel fehl  
Sait gli e Schneiderseele.

5

E' Musik'sellschaft uff d'r Höh'chi  
D'r Aff scho lang het ihne g'lust  
E' grosses Fest, druff elend Schulde  
Ab däne fast im Teifel grust  
Kapelle vorem Spaletor  
Dert blosse si e Trurmarsch vor  
E' Goldberg wo kai Pfennig wert  
Het d' Harmonie z'rstört.

6

Geduld muesch ha, wenn du wit gniesse  
Am Rhiweg bi d'r Bundesfir  
Vom Schwizergeist krieg'sch gnueg am Erschte  
S' Fürwerk durt bis zum Dritte schier  
Badenia hockt an de Tisch  
Und schnörrt vo Patroitismus frisch  
D'r Eidgenoss am Rhibord no  
Het scheen e Fuessbad g'no!

7

Bald hundert Jahr, sin's sit d'r Scheidig  
Jetzt wänn si wieder z'ämme goh  
Doch frog me sich in alle Kreise  
Was wird uff Traugig useko.  
D'r Brütigam scho ganz kunfus  
Bringt siner Brut, d'r Liebesschmus  
S' Versöhnigskind, e Kriz im G'nick  
Und nebebi e Zwick!